


OVITHIWA

 Tithi Oottotopeliwa a Wirimu, ni mu—Mukhalelo wa Erooho Yoowaarya ori vaava, hiyo ninnaattamela Masu Anyu Oowaarya. Nto kinaamwi ni nsu noohiloka kiilipihaka wira kivarelele, ni olavula moolumo voohaakuva ni volipa ntoko sinweryaaka, miyo kinvekela ohoolela Wanyu wa oMuluku ni muttikithelo wa Erooho Yoowaarya wira yeetteette eriyari ahu ohiy'ula. Ni wira Ole okhanle ookhala mapuro othene, Owo akuxe Masu a Muluku ni ovahe Yaawo khula murima, ntoko sintthun'ahu. Wira Owo anilyihe ohiy'ula, itthu sooreera sa Muluku.

² Nto ohiy'ula, okathi onlavul'ahu mwa Masu, mirima sahu sikhale imiilya sinci-ene sikelaka oKalvario, weiwo Yesu olinveawe ehisapo yuulupale yaavekeliwe ya ihukumu suulupale sa Muluku, okhuma omatta wEdeni. Ni olelo hiyo niwerye osuwela wira nookhalihwa anaxariya mahala-ene mwaha wo ohihimuwa Wawe, ni mwaha wo okhwa Wawe, ovithiwa, ni ohihimuwa.

³ Nto ohiy'ula hiyo khanihiyo-tho a molumwenkuni, okhala wira noothummwa ni ehisapo ya Ephome yooreeraxa ya Mwaana a Muluku. Ni wira hiyo, ni mirima sooxukhuru, nitthikele wa Nyuwo ohiy'ula, ni muupuwelo wothene ni ikuru, n'ile nrinaahu mwa hiyo, ni noorumeeleni ni murima, wooloka ni woohipahuwa.

⁴ Munivahe ohiy'ula, Tithi, yaakhanle-ene akina va ahinoosuwelani Nyuwo, mwa olevelela itampi saya, awo erwe ohiy'ula voowiiyeviha vamwiikimanyo, nto vaavo elape itampi saya wa Muluku okhanle a xariya, wira olevelele. Ni wira ola okhale ohiyu muulupale wa hiyo othene. Hiyo ninvekela mwa Nsina na Mwan'Inyu, Pwiya Yesu. Amen.

⁵ Vano hiyo ninnisuwela wira khaavo hata mmosa, mulaponi, onwerya voophiyerya okuxa Masu a Muluku ni wuupulula Yaawo, okhala wira Masu alempwe ni muupuxeryo. Erooho Yoowaarya ti Mwaneene Masu.

⁶ Nto okathi aaphaveliwaawe mmosa, Wirimu, wira akuxe Eliivuru ni otaphula Ikanyeryo, khaaphwanyuwe hata mmosa Wirimu, nnakhala elapo ya vathi, hata vathi va elapo ya vathi, aari oophwanela otaphula Ikanyeryo, nnakhala hata oweha Eliivuru ene. Ni aahikhala Mwaapwittipwitthi Vale aaiwiwe okhuma opattuxiwaka-ru olumwenku, nto Owo aahirwa khukuxa Eliivuru mmatatani mwa Ole aakalaanthe Veehicensi, khutaphula Ikanyeryo khukhunla Masu.

7 Ni hiyo nri ohiy'ula nimwaaminiki ni nimuroromelaka Yoowo, wira Owo onoonikhunlela Masu hiyo, nto vano kisomaka kapiitulu 2 ya Miteko.

8 Ntoko silaleenryaaka, ohiyu woopacerya waari *Orwa wa Neenli*, ni . . . wa Pwiya Yesu, ory'ene Namararu. Nto Namaxexe ohiyu waari mwaha wa *Mukuttho Woomalela mwa Sothene*. Ni Namathanu ohiyu waari mwaha wa *Ettipiheryo Yoomalela mwa Sothene; Yooloka voomalela*. Mwaahiiwa saana nsana ohiyu? *Yooloka voomalela*, moota okhanlyaaahu okhalaka oohittheka mara ni ooloka vamaithoni va Muluku! Vano ohiy'ula mwaha wa *Ovithiwa*. Nto meelo, *Ohihimuwa*. Siiso mahiku erowaka.

9 Vano koothanla ohiy'ula, wa osoma waka wa Yoolempwa, Eliivuru ya Miteko, kapiitulu 2 ni iversiikulu 25, 26, ni 27, nave. Ni Eyo enisommwa so, Petru alavulaka.

Davidi, *tthiri Davidi* oohimya *mwaha wa yoowo, Okathi wothene miyo kaaniwoona Apwiya ohoolo waka, maana awo ankhala moono aka woolopwana, wira miyo kihikhaleke oowoova:*

Tivo murima aka vantteeliwaaya vanci-ene, ni nlumi naka naahitthapa; hata erutthu aka ennimumula ni ororomela:

Okhala wira khamunihya munepa aka mookhwaani, makhala khamunthuniherya wira Oowaarya anyu antte.

10 Yoosoma xeeni yooreera ya ohiy'ula, wira niphwanye yoohimya ya Owo okhala mmahiye.

11 Etthu yoopacerya entthunaahu oweha . . . oruuhela-vo owiriyana wanyu, ohivonya wa Masu a Muluku. Muluku onnimaliherya Masu Awe, voolikana. Nto ohiy'ula nintthuna nikhalihe miyuupuwelo sahu vaavo, wira Muluku onnimaliherya Masu Awe. Hiyo pooti okupali wa khula etthu Muluku ohimaly'awe Mmasuni Mwawe, okhala Ekeekhai. Ni waamini khommumula vasulu va mithaaka sinkomowa sa akhili a mutthu wala teyoloxiia a mutthu, masi orina omumula waya wookiserya vasulu va Mwala ohinttikinyeya wa Masu a Muluku Ahinimala.

12 Masu! Vakhala wira Muluku oohimya, wira eyo Ekeekhai mahiku othene. Owo khokhanle ohokoloxaka ni wira, "Miyo nkaahimya yeeyo." Miyo kinoowerya ohimya itthu ni nyuwo munoowerya ohimya itthu, vano niri oothetemanela ohokoloxa, okhala wira nihimye ni osuwela wahu woolokaxa ni owerya wahu woolokaxa. Masi, nto, Muluku t'ovirikana saana ni hiyo. Owo t'ohimala, tivo Owo khonihimya etthu ehikhanle yoolikana voomalela. Owo khorina okhalakhala ohokoloxaka, khorina okhalakhala avekelaka muswammaha mwaha wa etthu Owo ohimyyaawe. Kweekwe enookhala, Ekeekhai.

¹³ Hata wa Yesu, mahiku ala maalupale hiyo nryaahu nitthapelaka, okathi Muluku vekeekhai omwiivaly'awe Mwan'Awe mwaha wa itampi sa molumwenkuni, khino saari miyaakha ikonto sene ehinatthi hata okhalihwiwa ephattuwelo. Muluku oolavula Masu, nto Owo muhokorokho woomalihwiwa Wirimu okathi Muluku onlavulaawe; ti woomalihwiwa. Oh, vaakhanle wira naaniwerya osuwela saana etthu enihim'yaya, atthu xeeni oovirikana naarowaahu okhala! Wira noone Mmaliivuruni Mwawe, ilamulo siheliwe mu w'ale oohiwelela, yaammwiiriha mutthu wiikoha murima awe mmansawe, ewoora ti ewoora; ni yaanwiiriha anaxariya otthapa vanci-ene, ewoora ti ewoora, osoma iparakha Muluku aalaihennyawe ale ooromeleya. Ni ninoowerya okupali wira khula Masu anoomalihwiwa, nilipiherye nankura munepa ahu vaavo paahi. Kweekwe enkhalaka siiso.

¹⁴ Okathi Muluku aalavunlyaawe ni Nowe, ottuli wu olumwenku wa mutaseke; khino alakela Bibilia ohinatthi hata olempwa, wala Bibilia ola, khula enamuna, ohinatoko olempwa; Muluku aahimuhimeerya Nowe wira aanirwa mwanankhaya, nto maasi yaarowa okhuneela elapo ya vathi. Ni woohikhala nlepa nimos na eyooniheryo wira yaamwiiraneya, itthu sothene soovirikana saana, Nowe ookuxiwa ni woova, aahiteka ekalawa, khutthokiha. Yaari wira yoopole etthoko awe ni yoowo mwaaneene. Muluku khonamuthepyeke, okhala wira yaari Masu Awe. Yaahaana wiiraneya okathi Muluku aahimyaawe wira yaamwiiraneya.

¹⁵ Vano, okathi Yobi, Eliivuru ya khalayixa mBibiliani, elempwe khino Maphattuwelo ahinatthi olempwa, ni khuheliwa mBibiliani. Vano Moise khulepa Maphattuwelo. Yobi, muLiivuruni mw'awe, owo aamumula va nttittimiho mwa natiri Muluku aamanenlyaawe. Nto owo aaheemela ni mukuttho awe woopahiwa, ohirina woova mmurimani mwawe; asuwelaka wira, etthu Muluku aahimaly'awe, Muluku aaniwerya opaka. Nto okathi sothene saakhalaaya ntoko orowa voovirikana, Yobi aahikhala oolipa okhala wira natiri a Muluku aari oolipa. Muluku aahimulaiherya Yobi, nto Yobi aamumula vasulu va natiri yoowo.

¹⁶ Oh, vaakhanle wira ekereja yaamukhalakhala eweryaka ophiya nipuro nenlo mpakha nipuro yaakhanlyaaya omumulaka vootittimiha mwa Masu a Muluku Ahinimala wira awo Ekeekhai! Evirikanelo xeeni yaarowa okhala, nttharuxo xeeni naarowa okhala, othikila xeeni waarowa okhala, ohakalala xeeni waarowa okhala, owoora xeeni waarowa okhala, okathi alopwana n'athiyana yaarowaaya omukuxa Muluku mwa efayelo y'ekeekhai, etthu Owo ohimaly'awe wira Ekeekhai. Voohicala sookhumelela sinooneya sayi, eyo kherina naata n'iyoo. Muluku ohimnye siiso; eyo ennimaliha mwaha!

17 Nto Yobi, okathi owo waary'awe okathi wootepaxa wehereriwa wa musuwelelo awe wothenene; okathi waaphwanyywaawe, Ohoolo wa Muluku, mutthu a xariya. Hata Muluku khuhimya wira owo aari ooloka voomalela. Khaakhanle hata mmosa aalikana ni yoowo mulaponi. Ni Satana aahivahiwa mureerelo wira amweererye, airaka, "Miyo kinoomwiiriha owo wootakhalihani ohoolo Wanyu."

18 Nto owo aahalela okuxa ekumi ya Yobi, ni aamwiira okunxe, masi Muluku aahikweretha mukaano, khwira, "Nyuwu mmwiiriheke etthu p'itthu, masi muhikumihe ekumi awe."

19 Nto okathi Yobi aaphwanyanyaawe voweereriwani vene wa okathi wothoniheyaya, owo aairale, "Miyo koosuwela wira Nvuluxa aka ookhala, nto mahiku ookiserya Owo onoovenya elapo ya vathi. Hata axiitthu epwetexaka erutthu ila, nlelo n'erutthu aka kinoomoona Muluku." Voochicala oriipela xeeni wooneyaaya, ni moota yooneyaaya ntoko yoohikhala, yaahikhala etthu Yobi aalipihenryaawe nankura munepa awe, natiri a Muluku Ohinimala. Oh, vaakhanle wira naamuwerya wira yeeyo paahi! Nwehe, owo aamumula mwa natiri, "Miyo koosuwela wira Nvuluxa aka ookhala."

20 Ni kintthuna wira nwehe, moolumo a ohoolo kintthunaaka ohimya, Yobi aahisuwelaxa nipuro nawe noovithiwa-vo. Nto okathi Yobi okhwiw'awe, owo aavithiwe siiso.

21 Aahikhala mulopwana mukina, aaihaniwa Abrahamu, yoowo aamukunxe Muluku mwa Masu Awe. Ni owo aanimwaamini Muluku. Ni owo aaihana itthu iye saari soovirikana ni natiri Muluku aammanenlyaawe, ntoko wira khisaakhanle. Owo aamukunxe Muluku mwa Masu Awe. Nto vaviralyaaya mahiku, ni isumana ni miyeeri, ni hata miyaakha saahivira, eyo khiyaamuhaaxale Abrahamu hata vakhani. Bibilia ohimye wira, "Owo khaamuhovenrye, mwaha wo ohaamini, natiri a Muluku; nave aari oororomeleya, amuttottopelaka Muluku."

22 Okathi sothene saakhalaaya ntoko, khula nihiku, vekeekhai yaakhala yoolipaxa khula nihiku; masi ohiya okhala ootteettheyaxa, Yobi aakhalaxa a ikuru khula nihiku. Oh, nrromelo xeeni woottottopeliwa orinaahu! Okathi mukacamiho onkhalaaya ntoko ovenya wira okhalihe etthu, Muluku olaihenryaawe, ohiweryaneya, ohiya ovolola, otthikela molumwenkuni, hiyo naahaana okhala ookhomaalaxa ovikana sitonko ahu okhala, mwa SIISO ANIHIMYA T'APWIYA. Yaahaana omaliha mwaha, okathi Muluku onihimiy'awe etthu.

23 Nto Abrahamu aahihana itthu iye saakhanle, ntoko sahaakhanle, okhala wira saari soovirikana ni Masu. Nto okathi Abrahamu opweteiwaawe oophentiwa awe ni mwaar'awe, Saara, vaamanlyaya miyaakha sinci-ene ekhalasaka vamosa, owo aahithuma epantte ya nipuwa waattamela nipuro Yobi

aavithiwaawe, khunvitha Saara. Munimwiikoha mwaha wa xeeni? Awo yaari maprofeta! Awo yaahoonasa! Awo yaahinkwannya Muluku! Nto vano okathi Abrahamu okhwiy'awe, owo aavithiwe vamosa ni Saara.

²⁴ Vano, owo khaathuna wira atthu ala envahe nipuwa nle. Owo aahithuma, ohoolo wa anamoona. Nthoonyeryo xeeni nooreera n'opatiiso. Owo aaroothuma, ohoolo w'anamoona, wira yaari ekhalanelo awe. Oh, eyo p'namuna yaatthuneya mulipaoowaamini eekeekhai orwa, kahi othereneya vanloothoni, masi weemela ohoolo w'anamoona, "Miyo ka namoona a Pwiya Yesu, ni a Erooho Yoowaarya, ni a miteko Saya suulupale," ni vanci-enexa noonaka nihiku nla nootakhala naattamelaka.

²⁵ Vano nto okathi mwaana a Abrahamu, yoowo aari Isakhi, natiri aari wira ovahiwe yoowo. Nto okathi Isakhi okhwiy'awe, owo aavithiwe vamosa ni Abrahamu. Ni Isakhi aamuyanre Yakope.

²⁶ Nto okathi Yakope aary'awe...aakhwiye wEjitu. Masi nwehe, owo ohinatthi okhwa, owo aahimuhimeerya mwan'awe profeta, Yosefe, "Murwe va, mwan'aka, muhele ntata nanyu vayuununi vaka voorakala." Maana muupuwele moota owo aarakanlyaawe, okhala wira Nlaikha n'Apwiya naarookwannya eyuunu awe, nto owo aanituthunya okhuma nihiku nenle mpakha ohoolo. Owo khwira, "Muhele ntata nanyu vayuununi vaka, ni mukilapehe mwa Muluku a axitiith'ihu, wira khamunikivitha weno wEjitu." Mwaha wa xeeni? Oh, awo yaahikhalanasa Masu, awo yaahikhalanasa muupululo!

²⁷ Ni kinimweemela vaava, kihimye wira ekereja ya Muluku mukumi etekiwe vasulu va muupululo wa Muluku; kahi vasulu va muromolelo, mitthenkeso, kahi vasulu va iyaaminelo wala miixuttiho, masi vasulu va Ekeekhai ya muroohoni yoowuupululiwa ya Muluku mukumi.

²⁸ Apeli, omatta wEdeni, aahikhalana okathi ekereja epacenry'aya. Owo aasuwenle sayi omuruuha mwaapwittipwitthi? Owo ahaaruhenle-ni muhokorokho ntoko Kayini siiralyaawe? Masi aarimuupululeliwa!

²⁹ Yesu emaara emosa alavulaka, airale, "Atthu aniira wira Miyo Mwaana a mutthu ki pani?"

"Akina khwira Nyuwo mwa 'Moise,' ni 'Eliya,' siiso."

Owo khwira, "Masi Nyuwo muniira wira Miyo ki pani?"

³⁰ Moone, eyo khenimumula vasulu va etthu mutthu mukina onuupuwel'awe, t'ile ensuwelaanyu okhala Ekeekhai. "Munihimyani *nyuwo*?" Yookoha eyo yaamukumana ni khula mmosa a hiyo wiitho ohiy'ula, "Munihimyani nyuwo?"

³¹ Nto Petru naanaanoru alavulaka, hata ahihovenrye, khwira, "Nyuwo mwa Kristu, Mwaana a Muluku mukumi."

³² Okhala wira Yesu Ole aasuwela isiiri sa mirima sothene, maana Owo khaari hata mukina woohikhala Yehova owooniheriwa mwa erutthu, nto Owo khwira, “Ooreeriwa ti nyuwo, Simoni, mwaana a Yona, maana erutthu n’iphome khewuupululenedi ila, masi Atithi Aka ari Wirimu ti yiirale yeela. Nto vamwala va Miyo kinooteka-vo Ekereja Aka, nto mikhora sa mookhwaani khasinwerya oxintta Yeeyo.”

³³ Nto hiyo atthu okathi onrwaahu, hiyo aLuteraano nintthuna neetteke mwaha wo waamini, hiyo aMetotista nintthuna nikhuweleke wira naakhele Yeeyo, nyuwo aPentekosite muntthuna mulavuleke ilavulelo wira mwaakhele Yeeyo, masi eyo eri ikilomo imilyawu muloko wa Yeeyo.

³⁴ Owo muupululo w’eMuluku wa Pwiya Yesu Kristu, Mutthu a Mukhalelo Awe owooniheriwa mmurimani, “Vamwala va Miyo kinooteka-vo Ekereja Aka, nto mikhora sa mookhwaani khasinrowa oxintta.” Eyo envara muteko voolikana ni Matewu :24, 5:24, ahiiso, Yohani Oowaarya 5:24, “Ole oniiwa Masu Aka, ni onimwaamini Ole okirumme, ookhalana Ekumi ehinimala; ni kharowa olamuliwa, masi oovira mookhwaani khuphwanya Ekumi.” Kahi mwaha wo wira mwaahikhalana mweettelo mmosa, eyuukhuwelo khata, masi okhala wira nyuwo mookhala, mureerelo wo okhalana Kristu owuupululeliwa nyuwo okhuma Wirimu, “Vamwala va Miyo kinooteka-vo Ekereja Aka.”

³⁵ Vano nto, Yakope, okathi okhwiya’awe, mwan’awe aahiphapa erutthu awe, vano owo aavithiwe vamosa ni Abrahamu, Isakhi, Saara, ni Yobi, Mmittettheni Soowaarya, oPalestina.

³⁶ Vano, Yosefe, ory’ene profeta. Aahithaaciri wEjitu. Owo aahimusuwela Muluku. Muluku aahiisooniherya Mwaneene wa yoowo. Nto okathi owo okhwiyaawe, airale, “Nyuwu muhivithe makhuva aka wenno, masi muhele...okathi...Nihiku nlo Muluku vekeekhai onimootholani!” Mwaha wa xeeni? Owo aahilipa voottittimiha vasulu va Masu a Muluku wa Moise, “Miyaaakha imiya xexe awo anoorowa orumeela elapo ela, masi Miyo kinimwaakumiha.” Owo aalipa voottittimiha vasulu va Masu.

³⁷ Nto eyooniheryo xeeni yooreera va, mwaweha vale. Khula muHeperi oviraka, ni muthana awe woomaniwa mpakha muhina, ni alipa-ooweettiha ipottha. Nto okathi owo aawehaawe makhuva a profeta awe, Yosefe, owo aahisuwela wira nihiku nimoso awo yaamukhumasa. Maana, makhuva ale yaahiwe iwe ntoko eyuupuxeryo, wira nihiku nlo awo yaamukhumasa.

³⁸ Soovira miyaakha soophiyaka muloko ni mithanu wala muloko ni mithanu na miraru okathi Billy Paul, mwammiravo oophiyaka miyaakha mithanu, voorika vanciene...Naahikhalana nluwa naamukhaani naakunxe-ahu niroihaaka vamahiye v’ame awe, oxaakaru voosiisu uwo, nihiku

na Paasikha, nsuwa nimalakaru okhuma, nithurumelaka; ahiiso omalakaru oxa, yaari, nto nirowaka omutekoni wo okokhorela. Nto vaphiyalyaahu vamahiye, mwammiravo owo khurula exapheyo awe nirowaka nipuro mwamurokor'awe ni ame awe yaavithiwaaya-vo. Vano owo khupacerya ohihimerya ni wunla, nto owo khwira, "Paapa, amaama ari vale mulittini mmwe?"

³⁹ Miyo khwira, "Nnari, mwan'aka. Awo khakhanle vathi vale mulittini mmwe. Awo ari vooreera imaara imilyawu sene woovikanani nyuwo ni miyo."

Owo khwira, "Kinoowoona-tho amaama?"

⁴⁰ Miyo khwira, "Ni mahala a Muluku, mwatthuna vale, munoowerya owoona-tho."

Khwira, "Erutthu aya enookhalakhala ekhumaka vamahiye va?"

⁴¹ Miyo khwira, "Oophentiwa, mphunye maitho anyu, nto miyo kinimooleelani wahala mwaamukhaani. Miyaakha imiya sinci-ene khalayi, voosiis'ula, yaahikhala mahiye yaahiiwe oohikhal'etthu." Miyo khwira, "Owo muupuxeryo wa 'ale anrupa mwa Muluku Kristu onimwaaruuha ni Yoowo Owo aarwaaka." Voohihoverya hata vakhani, miyo kinlipa voottittimiha vasulu va natiri Oohimala a Muluku!

⁴² Ntoko Yobi a khalayi, hiyo naaiwaka wira "ettuurwa mw'ettuurwa, ni etthaya wa etthaya," eyo enikuupuxerya Longfellow, yoowo iirale:

Muhikileele, iyaattelo sooxankiha,
Ekumi ti yooloha y'ohikhal'etthu!
Ni munepa ti naakhwa onrupa,
Ni itthu khasihiyo ntoko sinikhal'aya.

Owo ohimnye wira:

Ayo, ekumi ti y'ekeekhai! Ekumi ti
neemexeryo!
Ni mahiye kahiyo ti ekiseryo aya;
Maana nyuwo mwa etthaya, munootthikela
mutthayani,
Khiwaasiwa munepa.

⁴³ Awo aniihana eteyofaniiya, wira nakhuma va ninrowa nipuro nikina. Enakhaleru etthu p'itthu, miyo kinkuxa Masu a murummwa, okathi owo ohimnyaawe wira "Emp'ela ya vathi wala nipuro n'okhala yakurumuwa vale, nookhalana ekina ennilipelela, wira nikhume mwa *ela* nikelaka mwa Yeeyo."

⁴⁴ Abrahamu, Isakhi, Yakope, Yobi, maprofeta othene, awo yaaniroromela ni yaanaamini wira waamoorwa ohihimuwa, wira Nvuluxa aanirwa. Awo yaahilaleerya sa Yoowo. Enokhi aahilaleerya sa Yoowo; aalipa voottittimiha, aahilipiherya onamoona awe ni yeeyo. Isakhi, Yakope, Daniyeli, Yeremiya,

Ezekiyeli, awo yaalipa voottittimiha mwa okathi Mesiya aarow'awe orwa.

⁴⁵ Vano awo yaahikhwaasa nto minepa saya khukela oParatiiso. Awo khiyaawerya orowa Ohoolo wa Muluku, okhala wira (hiyo naahikhalana nsana ohiyu) wira ephome y'amwaanyompe ni ipuri khiyaawerya olevelela itampi; eyo yaamukhuneela paahi itampi, elavulaka ya nihiku Mukuttho wooloka voomalela; okhala wira ephome mwa mwaaxinama khiyawerya omuhokolowela mulipa-okokhorela, maana nto owo khaarowa wira ohiyale ovaha mikuttho ntoko seiyo.

⁴⁶ Masi okathi Mwaana a Muluku okhwiw'awe, Ekumi yaari mwa Yoowo khaari hata mukina woohikhala Muluku, wira otthike ni onikhalihe mw'emusini mwa Muluku. Nto vano hiyo n'ana a Muluku, Ekumi ya Mphomeni Mwawe.

⁴⁷ Vano nwehe naakuvaka, nittharaka. Okathi ottuli Waataana wa Khalayi, n'ale yaamini ni yaakokhorela, ni yaakhwiye mwa Waamini, alipelelaka okathi yoowo, mwaha maprofeta ale yiiralaaya yeeyo, ni yaatthunelaaya ovithiwa oPalestina, awo yaanisuwela wira ohihimuwa khuwaarowa okhala wEjitu. Waarowa okhala oPalestina, paahi.

⁴⁸ Tivo miyo kinihimy'aka ohiy'ula: Miyo kookhalana inamuna sothene sa masina; miyo khenikicala etthu atthu anikiihanaaya, eyo khenihimya etthu wa miyo. Etthu emosa paahi enthun'aka wira, ti osuwela ela: wira miyo kihookhwa, ni ekumi aka yoosukiwa mwa Kristu, ni Muluku, ni kootthittiwa ekanyeryo ni Erooho Yoowaarya; wira Owo aihanaru eriyari y'alipa-ookhwa, miyo kinimwaakhula nihiku nenlo. Mukivithe mwa Kristu, okhala wira ale ari mwa Kristu Muluku onimwaaruuha ni Yoowo nihiku nenlo.

⁴⁹ Ninkela sayi mwa Kristu? aKorinto Oopacerya 12:13, "Mwa Erooho emosaru hiyo othene noopatisiwa mw'Erutthu emosaru, nto khukhala atthu anammuttettheni a Momweneni mwa Muluku." Hiyo nnihimya okhala anawetta ni amalapo mulaponi mu, tho, nihiphavelaka itthu iya sa molumwenkuni, masi nilipelelaka orwa wa Mwene oottottopeliwa wira okuxe elamulelo, okhuma ephareya mpakha ephareya yooohikhalana mukaano, okathi Owo onrwaawe movuwani Mwawe. Vekeekhai, hiyo ninwehererya Orwa Wawe.

⁵⁰ Vano nto kuuvo ohoverya mmuruni mwaka, wira ti yeeyo Yesu aarin'awe mmuupuweloni Mwawe okathi Owo aary'awe muumu elapo ya vathi, aari ohivonyeya iwe wa Masu a Muluku Ahinimala. Maana, hiyo noosuwela wira mwa Yoowo waakhala omalela wa oMuluku mw'Erutthuni. oMuluku wothene waari mwa Yoowo. Owo aari sothene Tithi, Mwaana, ni Erooho Yoowaarya, masi aakhala mwa mukhalelo wa mutthu; eteyofaniya ya Muluku, elatarato yuulupale ya Muluku Owo aamukhalinh'awe mutthu, vano khimuhela mulaponi. Owo

aahikhalana erutthu. Muluku khokhanle oohikhalana erutthu. Muluku ookhalana erutthu, ni eyo enkhala ntoko mutthu. Moise aahoona eyo, akina yaahoona, ni enkhala ntoko mutthu.

⁵¹ Ni eyo elatarato paahi, *ela* ti yeeyo, wa ele Eyo ekhanlyaaya. Ni sothene mulaponi, oreera, esivelo, oreera w'elapo, kehiyo hat'etthu ekina molumwenkuni woohikhala waakhula wa etthu yooreeraxa ovikana eyo, enniwehererya hiyo okathi onihiy'ahu olumwenku ula. Okhala wira, itthu sothene mulaponi ettharihelo paahi ya ele eri Wirimu. Sothene siri sooreera, sothene siri sa exariya, sothene siri sooreera, miri, axipalame, itthu sothene, eyo ettharihelo paahi ya ele eri Wirimu.

⁵² Ekumi ahu ene ettharihelo paahi. Eyo erukuu paahi, nto kahi etthu y'ekeekhai. Eyo epantte ya nekatiivu. Ontthuneya okhwa wira ekhalihiwe elatarato, wira enihokoloxerye muteyofaniiyani okhummyaahu-mo. Vano woohihimuwani ninrwa nilikanaka ni Yoowo, erutthu yoohihimuxiwa. Ereerelo xeeni; kahi yooreera paahi, masi ti y'ekeekhai, Ekeekhai ya nttittimiho ya Masu a Muluku Ahinimala, wira ninrowa okhala oolikana ni Yoowo.

⁵³ Nwehe vano, Yesu, aaheliwe owerya wothene wa Muluku, masi, okathi Owo okumanne-awe ni Satana, Owo khaarumeenle hata omosa wa owerya Wawe. Owo aahimmye Masu paahi! Owo aahiira. Owo aairaka, "Yoolempwa wira, 'Mutthu khonkhala mukumi ni yoolya paahi, masi ni Masu othene ankhuma mwaano mwa Muluku.'"

⁵⁴ Vano munwerya sayi nyuwo ohimya wira munoowerya okhala owaani ni okhala ooreera murima ntoko muKristu ntoko saarowaanyu okhala okereja? Khamunwerya wira. Musome Masu! Erooho Yoowaarya enlya Masu. Bibilia ti yoolya ya erooho ya Muluku wa Ekereja Awe. Ni Erooho Yoowarya ti Ele enooruhelani Yeeyo nyuwo ni okhaliha yeeyo mmurimani, ni oxukhurela nyuwo munookhuwari Yaawo. Ni khula natiri a Muluku onookumiherya vekeekhai ele Muluku ohimmy'awe wira aamwiira. Ehaana wiiriwa. Awo Masu Awe, ni Awo t'Ikumi.

⁵⁵ Vano, kaahiliyala wira kaahaana okhalana ewoora nuusu paahi. Ennikikuxa okathi munci-ene wira kiphiyerye etthu enthunaaka ohimya.

⁵⁶ Masi nkanwehene Yesu ewoora yookiserya, wala piili, wa ekumi Awe, soolaleeriwa s'eprofeta sinci-ene, sinci-ene saahimaliheriwa.

⁵⁷ Ookhala aakihimenrye wira, "Munna Branham, *ela* ehaana wiiraneya, ni *ele* ehaana wiiraneya."

Miyo khwira, "Vaamuweryaneya wiiraneya muhina mwa ewoora emosa."

⁵⁸ Mwasomaru Masalmo 22, vano nto nwehe ewoora Awe y'okhwa vamwiikimanyo, kinooliyala vano soolaleerya kavi s'eprofeta soosuwaneyeya saamaliheriwe iwoora piili wala

tthaaru sookiserya sa ekumi Awe! Vekeekhai, “Awo aathorola inawu Saka ni matata Aka. Muluku aka, Muluku Aka, mukinyanyalenleni?” ni sikina, ntoko Davidi saakhuwenly’awe.

⁵⁹ Vano nto etthu ekina kintthunaaka wira nwehe, Ekeekhai, mpantte woohivonyeya wa Masu a Muluku. Bibilia ohimmye wira, “Owo onnikhapelela makhuva Awe othene, hata nimosa khannintiwa.” Maana mwa ethoonyeryo, mwaapwittipwitthi a paasikha aari ethoonyeryo ya yeeyo. Mwaapwittipwitthi ohaana okhala oohirakala, hata nikhuva noowunteya nihikhaleke mwa mwaapwittipwitthi. Nto okathi Owo aary’awe. . .Owo aahikhwa, awo khuwela wira yante metto Sawe ni enyutto. Nto okathi ene yoole ohinatthi. . .Nkawehani okathi ene yoowo woophaveleyaxa! Mulopwan’owo ni enyutto, oolikana wira amane metto Sawe, masi Masu a Muluku yaahimmye wira, “Khaninrowa okhala hata nikhuva nimosa noowuntiwa mw’erutthuni Mwawe.”

“Enrowa wiiraneya sayi?” Ninookela naakuvaka.

⁶⁰ Masu a Muluku t’Ohimala! Vakhala wira Masu a Muluku t’olikana voomalela siiso, ale ari mwa Kristu t’okupalixa wira anoohihimuwa okhala wira wookhala ohihimuwa. Muluku ohaana omaliherya Masu Awe, wira oovoniheni, ntoko Owo sirinaawe wira owoopoleni. Maana, Owo, ti Masu Awe alaihenrye yeeyo. Awo Masu a Muluku, ni hiyo khanrina ehaakhi y’okumiha-Mo. Masi wira paahi, “Eyo Ekeekhaii.” Mwaamini Yaawo! Hata wira enikhumelela exeeni, mwaamini Yaawo, khula enamuna. Ti siiso ale akina yaarin’aya waamini Yaawo, ni hiyo kanihiyo ookumihiwa mwa yeeyo. Muluku aahinhava Palestina Isarayeli, masi awo yaahaana owanela khula esentiimeturu ya ethhaya awo yaarinaaya. Natiri t’awinyu, masi nyuwo muhaana owanela khula esentiimeturu munihimy’anyu; xetwani onookhapelela eyo, vekeekhai owo onimwiira.

⁶¹ Masi nwehe okathi awo yaary’aya oolikana wira yinte metto sa Pwiy’ahu Yesu, enyutto ele yaamanneru mwetto khunta, Muluku aamphwanyiswa akhalaka oowootha. Masi khiyaakhanle axetwani oophiyerya moohaaxani mothene mooriipela wira yiirihe enyutto ele omana erutthu ile yooreeraxa. Maana Davidi, miyaakha imiya thanu na tthaaru ohinatthi okathi ule, aahihimya, “Khaninrowa okhala hata nikhuva nimosa ninrowa wuntiwa mw’erutthuni mwAwe.” Masu a Muluku ahaana okhala Ekeekhai.

⁶² Masi awo yiirale exeeni nto? Awo yaakunxe nivaka khuhomeerya mpararini mwAwe, nto Ephome ni maasi khukhuma, wira emaliheriwe ele Bibilia ohimaly’awe wira, “Awo aathorola matata Aka ni eparari Aka.” Masu yaahimaliheriwa.

63 Vano okathi Owo waakhw'awe, oh, okathi xeeni wowoopihiwa! Kinuupuwela nsipo nle, ni, vaxariya, nlo ninnikooniha woopiha, okathi onuupuwelaaka nsipo nle poweeta olempyaawe miyaakha sinci-ene khalayi:

'Eriyari ya miyala soophweeya ni osulu
wooriipela-wo,
Moopoli aka aahuuramiha muru Awe
khukhwa;
Ekuwo yookhunliwa yaahuupulula ephiro ele
Ya itthapelo sa Wirimu ni nihiku noohimala.

64 Nto okathi Owo aathomeiwe-awe vale, avuuvaka ephome ni akhwaaka, okathi Owo uuraminhe-awe muru Awe, nsuwa naahuuliwa muru saana, oweha soopattuxiwa sinookhwa seiyo Muluku opattuxalyaawe ailikanihaka Yoowo, aarowa okhala ooliva ehisapo ntoko eyo wira ovuluxe, nsuwa naahikhootta oweha vathi mulaponi ewoora eyo. Mweeri waari woowuuliwa muru saana mpakha owo okhuma voopuroni vaya. Ni ittheneeri saahirukunuwela ettuli aya elapo ya vathi. Etthu xeeni yootakhala etampi yaarinaaya okhalaka! Moota Muluku aarin'awe ovara muteko ni yeeyo!

65 Ni owoona anamukuttho ale, ni isenye siryeene wiitho Wawe. Mulopwana mmosa khummana Owo vamuru, ni mutathi, khwira, "Nyuwu mwaari Profeta, munleele oomanneni." Mmosa aya khuropocola ireru wiitho Wawe, vano khunvaha nlaathuma Owo wiitho, nto aatthuna wira Owo aikumiherye Mmansawe.

66 Owo khwira, "Omwene Aka waari wa olumwenku yoola, kaanwiithana Atithi Aka naanaanoru, Awo yaamukirumihela makhuru muloko ni maili a Malaikha."

67 Vaamuweryaneya okhala oorukunxiwa, masi vaaweryaneya sayi Owo wira? Owo khaakhanle wira tu, maana yaari an'Awe yinlelaka Ephome Awe. Mwaamuwerya omutthokelela paapa, tiithi, ni an'awe (mw'epiphini) yinlelasaka ephome ya tiithi aya? Mwaha wa yeeyo Owo ahaakhanlyaaawe wiiraka etthu ekina woohikhala okhwa. Owo ahaakhwiye, yaari ehukhumu wa an'Awe, yaari ehukhumu wa soopattuxiwa. Masi Owo aahaana okhwa, wira owoopole atthu Awe.

68 Nto Owo vairalyaawe, okathi Owo uuraminhaawe muru Awe, elapo ela ya khalayi yaahinyakharuwa ottuli waya. Khino siiso yaahileiye, maana Bibilia ohimnye wira "elapo yothene, okhuma ewoora ya neethanu na mosa mpakha ya neethanu na xexe, yaari yooriipela, waari mulaponi mothene." Nto elapo yaahithukumela, ni miyala saahiphweyasa. Nto ekuwo ya mpaani mookokhorela yaahikhereya opacerya osulu mpakha vathi; ithaapwa sa mukuttho saahipiluwa. Mwaana a Muluku mukumi aarimookhwa. Owo aahikhwaaxa mpakha nsuwa osuwela. Owo aahikhwaaxa mpakha mweeri osuwela. Owo aahikhwaaxa mpakha ittheneeri osuwela. Owo aahikhwaaxa

mpakha elapo ya vathi osuwela. Owo aahikhwaaxa mpakha itthu ineenexa osuwela, musulu osuwela eyo. Sothene saahaana osuwela wira ole aari Mwaana a Muluku! Maana, Masu a Muluku khiyaakhanle ovonyaka, Owo aahilaiheriwa, omatta wEdeni, “Osuulu waarowa onyakatta muru w’enowa.”

⁶⁹ Vano exeeni yaamukhumelenle Owo? Owo aaronwe vayi okathi Owo okhummyawe vamwiikimanyo khukela mmahiye mwa Yosefe a Waarimateiya?

⁷⁰ Owo khaareere ohaawa vahaarinaawe nipuro nowuuramiha-vo muru Awe. Owo aayariwe mwaalyela inama, ni nsina nooriipa ottlu Wawe, ntoko “mwaana ooraruiwa.” Owo aanitheiya, oveehiwa, aahiyemuliwa, mulaponi. Owo aahiveehiwa, ni okhooitiwa. Nto okathi Owo okhwiyaawe, Owo aahaana okhwa ni ehukumu yo wiiva, eriyari ya anawiiye aili. Ni khiyaarina hata nipuro n’onvitha-vo Owo, nto Owo aavithiwe mmahiye a mulopwana mukina. Muluku yoole a Wirimu orwaaka elapo ya vathi! Hiyo ninuupuwela wira n’ani, nrinaahu oviraka moohaawani vakhani? Etthu Owo oniirenyaawe hiyo! Muupuwele yeeyo, mpatthani, musome yeeyo.

⁷¹ Nakhotto muRooma aairale wira, “Vekeekhai, ole Mwaana a Muluku.” Natampi aahaana osuwela. Yuta iirale, “Miyo koolupattha Ephomeya yoohitheka.” Owo aahaana osuwela. Elapo yothene yaahisuwela.

⁷² Vano Owo aaronwe woowi? Mutthu akhwa vale, eyo ennimaliha? Nnari, mulopwana. Owo aahaana okhwa siisaale okhala wira Bibilia a Muluku aahimye wira Owo aarowa okhwa siisale. Ni Owo aaroromela Masu a Muluku. Mwaha wa yeeyo Owo aaweryaawe ohimya, mwa ekumi Awe, “Mpwxakase emp’ela, nto Miyo kinooteka muhina mwa mahiku mararu.”

⁷³ Maana Davidi oohimya, nipuro nimosa, paahi, mBibiliyani, vathi va muupuxeryo, okathi Davidi, mutthu a Muluku, profeta aari ooreerihwa ni Masu, aahimya wira, “Miyo nkiniimuhiya Oowaarya Aka wuntta, nnakhala nkinihiya munep’Awe mookhwaani.”

⁷⁴ Yesu aahimye wira, “Nyuwu mpwetexe erutthu ila, nto Miyo kinoovenxa muhina mwa mahiku mararu.” Owo aanisuwela wira Masu a Muluku khiyaakhanle ovonyaka. Oh, wulu!

⁷⁵ Vakhala wira Owo aahiwerya omumula voottittimiha-vo vasulu va yeeyo, aaminiki wira Masu a Muluku khiyaakhanle ovonyaka, khivatepanxe hiyo owerya omumula voottittimiha-vo wira nooyariwa vasya ni Erooho Yoowaarya, ni Eyo namoona mmurimani mwahu naanaano va wira noosuwela wira Nvuluxa ahu okhala ni onimoorwa-tho nihiku nlo. Mukupaliki wira ale ari mwa Kristu Muluku onimwaaruha ni Yoowo! Vano nwehe.

⁷⁶ Owo aari vale. Owo aanisuwela wira hata erukuruku emosa ya erutthu ile khiyaarowa wuntta. Iwoora miloko mithanu

na miili ni piili, wuntta onookela. Mwaha wa yeeyo Owo ahaakhanly'awe mahiku mararu. Owo aakhwiye Namathanu oxekuwa, khuhimuwa Ettiminku voosiisu. Masi, waari muhina mwa mahiku ale mararu. Muhina mwa mahiku ale mararu Owo aahaana ohihimuwa, okhala wira Owo aahiroromela Masu a Muluku.

⁷⁷ Owo onrowa va! Owo aakhumme vayi okathi okhumaly'awe? Bibilia ohimye wira, "Owo oroowela. Owo aahirowa khulaleerya minepa s'atthu saatthukweliwe, yahaarukunxale murima mahiku oowehererya a ovilela a Nowe." Munep'awe, Erooho Awe, eteyofaniya Awe ya Mukhalelo Awe Mwaneene, saaronwe vathi. Nrowe nimutthare Yoowo. Mwaamutthuna, ohiy'ula, omutthara Yoowo minuutu vakhani? Nrowe noone nipuro Owo aaronwaawe.

⁷⁸ Vathi tu mapuro a atthu ookhwa omphwanyaneya mukhalelo wa owerya wa xetwani; vathi wira...vasulu vaya yeeyo simphwanyaneya minepa s'ale ootakhala; vathi vaya emphwanyaneya elamulelo ya Satana, omooroni. Vano vasulu vahu emphwanyaneya Erooho Yoowaarya; nto vathi v'Altaari simphwanyaneya minepa s'atthu a xariya; vootharana ti Muluku Mwaneene. Emosa enrowa vathi, emosa enrowa osulu; irooho soopiili siri muumu elapo ya vathi, saavaraka murima atthu a elapo ela.

⁷⁹ Nto okathi Yesu okhwiw'awe, Owo onoowela, vathi vale. Kinniwerya omoona Owo Namathanu oxekuwa, nuumala okhwa Wawe, [Munna Branham ommana vapulpitu—Mol.] amanaka mukhora wa mapuro a ale oopweteya. Nrowe nimutthare Yoowo minuutu mmosa. Mikhora khuhuleya. Yaahikhala athiyana, yaahikhala alopwana, yaahikhala aximwali, yaahikhala anaxuulu, awo othene yaari vamosa mapuro ale owoopiha aniihaniwa mukhatteya wa minepa soopweteya.

⁸⁰ Kaakhalanne okathi, kaatthuna kooleleni. Ni siiso ekhanleene yoowoona. Masi emaara emosa kaahixekurya nipuro nlo, khukhuwela wira kimoreliwe ikharari, okathi waary'aka natampi kooperariwaka. Okathi okhumaly'aka, keemenle Onikela nsuwa, kivenxenrye-ene matata aka Wirimu, ni mwiikimanyo waaryaka wa miyo.

⁸¹ Masi nipuro nenlo nooriipiha murima iwe, Yesu aahiphiya vamukhora. Itthu sothene saahaana okhalela onamoona wira Owo aari Mwaana a Muluku, okhala wira awo yaahilaleeriwa moovilelani wa mahiku a Nowe. Khumana mukhora, Owo khwira, "Miyo ka Yoole Enokhi aamuhimyaawe. Miyo ka Osulu wa muthiyana, waari wira onyakatte muru w'enowa. Masu othene a Muluku aamalitheriwa; Miyo kinoomalaru okhwa oKalvario iwe, ni Miyo koothuma Ekereja Aka. Nto Ole Enokhi aamuhimyaawe, Miyo ka Yoowo." Ni awo yaari oohimoreliwa ikharari, oohikhalana nrromelo, okhala wira yaahitthekasa. Nto mukhora waahiwaliwa wiitho waya.

82 Vathi mapuro a axetwani! Vathi mmikhorani sa omooroni! Owo ommana mukhora. [Munna Branham ommana vapulpitu—Mol.]

83 Ola p'ukathi Owo aary'awe mmahiye, erutthu Awe eryaaya, elipelelaka ohihimuwa. Owo aahixekurya mapuro aleanaxariya ni ootakhala anrowaaya; weiwo nyuwo onrow'anyu nimosawa mahiku ala, nipuro nimosawa wala nikina.

84 Nto Owo ommana mukhora wa omooroni. [Munna Branham omanne vapulpitu—Mol.] Nto, Owo vairalyaawe siiso, xetwani khukhuma. Ni kinniwerya omwiiwa owo wira, "Oh, vano vookiserya Nyuwo moophiya. Vekeekhai miyo kuupuwela wira kaahiwiivani okathi waamwiivaly'aka Apeli."

85 Moone, okathi Epyo eyo yaalaiheriwaaya omatta wEdeni, xetwani voohihiererya oneererya ohonona Epyo eyo. Nto okhwa wa Apeli, ni orwa wa Sethi, waari okhwa, ovithiwa, n'uhihimuwa wa Kristu. Epyo eyo ehaana okelela ohoolo. Ni owo aaheererya ohonona Eyo.

86 Owo khwira, "Kuupuwela wira kaahoomalihani okathi omwiivalyaaka Apeli. Kuupuwela wira kaahoomalihani okathi waatholonxaaka maprofeta. Miyo kaahikupali wira kaahoomalihani Nyuwo okathi waamuremmyaaka Yohani. Masi vano, nuumala sothene iyo, Nyuwo moophiya. Miyo kihoophwanyani vano." Oh, wulu!

87 Kinniwerya omwiiwa Owo wira, "Satana, murwe va!" Owo ti Mukhulupale vano. Onoophiya, khukuxa ehulelo ele ya mookhwaani ni omooroni epantte awe, khuvarela epantte Awe Yoowo. "Kintthuna koolopoleni. Nyuwo munnikhalaka eyoothelo okathi woophiyerya. Miyo ka Mwaana ooyariwa ni harusi a Muluku mukumi. Ephome Aka nlelo ti yonaana vamwiikimanyo, nto eteeni yothene yoolinwva! Nyuwo khamurina-tho ihaakhi. Nyuwo mooruliwa. Mukivahe ihulelo iyo!" Ti yeeyo. Khurukunuwa khunvaha mukhutaape wooreera w'ekumi, khumanela mukhora vamosa, ni khwira, "Mukhale memmo! Miyo ka Mukhulupale okhuma vano mpakha ohoolo."

88 Vano, Owo khaarina ihulelo sa Momweneni, okhala wira Owo aavanhe Petru; hiyo nihoona yothene eyo voosiisu, mwa opatiiso wa mmaasini. Masi owo aarina ihulelo sa mookhwaani ni omooroni, nto Owo aahikuxa; nuumala ohihimuwa Wawe, Owo iirale, "Miyo kookhalana ihulelo sa mookhwaani ni omooroni." Petru aarina ihulelo sa Momweneni. Satana aahikhalana ihulelo sa mookhwaani ni omooroni; masi vano Yesu t'orina, Owo ti Mukhulupale.

89 Va Owo onoopacerya. Oniphiiyerya Paasikha; okathi onoovira waakuvaka. Masi nookhala nikhuru nikina. Yobi ori vayi? Abrahamu ori vayi? Awo arisa vayi? Arisa woowi atthu ale yaaroromenle Masu a Muluku? Owo orimwaaliyala? Okhwa

orimwaamalimaliha? Eyo yaari yothene ya yeeyo? Nnakhala, nnakhala; Muluku ohaana osuka Masu Awe.

⁹⁰ Kinniwerya omoona Owo. Nrowe nithurumele vakhani oParatiiso, nto niwehe-wo. Nto kinnimoona Saara ni Abrahamu yeettasaka vale, nto nuuvira okathi vakhani [Munna Branham onoomana—Mol.] etthu emosa vamukhora. Abrahamu onoorowa khutthukula mukhora, khwira, “Oophentiwa, murwe va. Nkawehani va! Nkawehani va, ole ti Yoole aakhanle ni miyo mukhitte mwa karvaalyo nihiku nle.” Ole ti Muluku a Abrahamu.

⁹¹ Okathi ene yoowo kinniwerya omoona Daniyeli oweha vanikhatani wawe, ni wira, “Ole ti Mwala yoole waapharuliwe vamwaako, voolikana ntoko miyo seemenlyaka va.”

⁹² Kinnimoona Yobi ovenya, khwira, “Owo ti Nvuluxa aka miyo kaahimmy’aka wira kaahisuwela wira aahikhala, ni nihiku nlo Owo aanvenya mulaponi. Erutthu aka pooti ohikhala yoovikana ekhwiyeri yaamukhaani y’ettuurwa, masi muhina mwa minuutu muloko ni mithanu okhuma vano kinookhala-tho mwa yeeyo. Ti Yoowo.”

⁹³ Ezekiyeli onweha vasulu, khwira, “Miyo kaahimoona Mutthu ene yoole ntoko Nttheke eriyari ya Nttheke, nivilikeyaka nirowaka eriyari ya musulu.” Oh, wulu!

⁹⁴ Nuumala onoorwa Enokhi. Enokhi khwira, “Miyo kaahimoona Owo orwaaka ni masantu Awe ikonto muloko, wira elamule.”

⁹⁵ Yaahikhala masantu a Waataana wa Khalayi elipelelaka, vekeekhai awo yaahikhalasa, vathi va elivelo ya ephome. Awo khayaawerya orowa Ohoolo wa Muluku, Muluku a Wirimu, okhala wira epuri ni epwittipwitthi khisaawerya okumiha etampi.

⁹⁶ Masi Owo khwira, “Axinn’aka, Miyo ka Yoole nyuwo munuupuwelaanyu wira ka Yoowo. Miyo ki Osuulu wa muthiyana. Miyo ka Mwaana a Davidi. Miyo ka Mwaana a Muluku. Miyo ka Ole oyariwe ni harusi. Ephome aka yoolivela eyo. Nyuwo mwaalipelela vathi v’ephome ya ipwittipwitthi ni ipuri, masi vano Ephome Aka ennittipiha, nto nyuwo mootaphuwa. Nrowe niwele osulu, ohanle ophiya Paasikha.” Muupuwele paahi, eyo yaari iyaakha soophiyaka ekonto emosa n’imiya thanu na xexe n’itthu khalayi, ohiy’ula.

⁹⁷ Kinniwerya omwiiwa Abrahamu wira, “Pwiya, naphiyaru-tho mw’erutthuni mwahu; ni Saara ni miyo yaahinisivela saana; Nyuwo munnicaliwa neemenle-ru vakhani, p’uhimya wene, mphironi Mwanyu?”

⁹⁸ Ahe, kinniwerya omwiiwa Owo wira, “Vano, nnari, vekeekhai nnari. Kinrowa okhala n’awiixutti Aka mahiku

miloko mixexe. Kiwehawehe koone moota itthu sothene siryaaya!”

⁹⁹ Voosiisu ule woovuwa wa Paasikha (yoowo onrowaahu okuxa voosiisu, Apwiya yatthuna vale) okathi Owo ohihimuwaly’awe mw’alipa-ookhwa, Bibilia ohimye wira, voolikana ni Matewu Oowaarya 27, wira “Masantu anci-ene yaarupa mutthayani va elapo ya vathi, yaahihimuwa khukhuma mmahiye.” Yaari aani? Abrahamu, Isakhi, Yakope, Yobi, ale yaasuwenle ni muupululo wowuupululiwa wa muroohoni wira Nvuluxa aamukhala elapo ya vathi nihiku nlo. Ti yaawo, mihokorokho soopacerya sa ale yaarupa. Awo khuvolowa mmuttettheni. Kinniwerya omoona Saara ni Abrahamu, mmiravo, ni oosareya . . . ni oophwaneliwa, ni—ni oowaatta ekumi, wira ehuluvale-tho, wira ehiwereiwe-tho, wira ehivoliwe-tho etala, yeettakasaka mw’erutthuni mwaya.

¹⁰⁰ Kaifa eemenle-ene vale, airaka, “Moosuwela? Yaahikhala etthu yaakhumelenle nihiku nlo, nkawehani paahi mw’evitikavitika ela emp’ela moolompa eryaaya-mo! Yookhala . . . Nihaana orowa okhalana mutthu wira ottotthe ekuritiina eyo. Nkawehani, mavuku ale a mukuttho orukunxiwa. Exeeni yiiraneieye? Mmirav’ole aari namasoma ittheneeri? Owo aari mukhwiri? Wala, exeeni yiiraneieye? Khwira! Murwe nno, Josephus, taani anaithoko ale amiravo yeemelanse vale?”

Abrahamu khwira, “Saara, hiyo noosuweliwa. Vanreerela nikhume.”

¹⁰¹ “Yaahaakhumelela anci-ene!” Eyo khiyaari yothene ya yeeyo. Kimalihaka, nwehe. Nihiku nimosu nuumala Owo okhalana . . . awo yaahithotola; Abrahamu, Isakhi, Yakope, ni othene aya yaahithotola elapo aya. Okathi Yesu ohihimunw’awe . . .

¹⁰² Nyuwo muniira, “Munna Branham, eyo ti ya ethale?” Nnari, mulopwana! Miyo kinoowoonihani mwa Soolempwa, minuutu mmosa.

¹⁰³ Okathi Owo opaceny’awe owela osulu, awo yaamoonne Owo paahi, masi masantu a Waataana wa Khalayi yaaronwe ni Yoowo, maana Bibilia ohimye wira “Owo ohaakuxa ootthukweliwa, ni ohaakawela atthu soovaha.” Ni kinniwerya omoona Owo okathi onwelaawe, ni wiitakaniha ni ekereja Awe.

¹⁰⁴ Malaikha maili a mmulokoni yaarumiha muusika, khutthikela iwe, nto khwira, “Nyuwo atthu a oKalileya, mweemelenle-ni nwehaka osulu? Maana Yesu ene yoola, owelihiwe wirimu, onimoorwa-tho.” Vekeekhai! Awo khutthimakasa ethhikelaka wira yiitakanxe moothataanani.

¹⁰⁵ Nto okhuma vathi ovira musulu Yesu ni masantu a Waataana Wa Khalayi yaahirowa. Awo yaahivirasa mweeri, khuvira nsuwa, khuvira ittheneeri. Nto awo vaphiyeransyaaya wona, Wirimu iwe wuulupale wooreera ni wootteela,

masantu a Waataana Wa Khalayi yaahikhuwela, ehimyaka Yoolempwa, “Muttukhuwe, nyuwo mikhora sa mahiku othene, nto muttukhuliwe! Muttukhuwe, nyuwo mikhora sa mahiku othene, nto muttukhuliwe! Nto mmuhiye Mwene a Movuwani ovolowe!”

¹⁰⁶ Malaikha othene yaathukumanne vasulu va ikorimawu sa Wirimu, khwira, “T’ani Mwene ola a Movuwani?”

¹⁰⁷ Masantu a Waataana Wa Khalayi khwira, “Apwiya a anakhotto, oowerya mukhottoni! Owo aari Muxintta!”

¹⁰⁸ Nlaikha khuttapunya epitawu yuulupale, nto mikhora sa maluku oowaarya khuhuleya.

¹⁰⁹ Muttetthe wa oYerusalemu khukhuruwela, Muxintta muulupale, oowerya aaruuhaka masantu a Waataana wa Khalayi. Muloko wa Malaikha wiipaka, okathi Malaikha yaakhuwelaaya. Owo aari Muxintta oowerya! Owo aarina ihulelo sa mookhwaani ni omooroni siryeene epantte Awe, orowaka oviraka mampa a omwene a Woovuwani mpakha Owo ophiya Veehiceni. Nto Owo khwira, “Tithi, ala ari va. Awo yaanaamini, mwa waamini Masu Anyu, wira Miyo kaamoorwa nihiku nlo. Miyo kooxintta soopiili okhwa ni omooroni.” Yaari exeeni iyo, munna? Owo aarina mirahu mmatatani mw’Awe, wira ooniherye wira Owo aahikhala mukhottoni. Avuwihwe Muluku Wirimu-rimu! Owo ti Muxintta ole oowerya! “Ala va, Tithi; Abrahamu, Isakhi, ni Yakope.”

¹¹⁰ Kinniwerya omwiiwa Owo wira, “Mwan’aka, welani osulu nno epantte Aka, mukilaathi mpakha Miyo kimukhalihe khula nwanani Anyu ntthatto na inawu.” Munna, nihiku nlo Owo onimoorwa-tho, nto nihiku xeeni ninrowa okhala!

¹¹¹ Owo khaari oonyoonyiwa okathi waaryaawe mmahiye. Hiyo ninuupuwela wira Owo aammaathale mme, ookhwa-ene. Masi Owo nlelo aari vathi nlelo axinttaka, Owo aaronwe vathi khukuxa ihulelo wa Satana, Owo ookhalana ihulelo sa mookhwaani ni omooroni, ohiy’ula. Owo ohimmye wira, “Okhala wira Miyo ka mukumi, nave-tho nyuwo munookhala, akumi.”

¹¹² Kaatthuna kisuwele ohiy’ula, munn’aka mulopwana, muthiyana, muhuupuwela yeeyo vaxariya-vo? Nyuwo munnisuwela wira nyuwo munikhala paahi okhala wira Owo mukumii? Nyuwo mooxukhurela yeeyo voophiyerya wira mwiivahererye, ni wira, “Muluku, miyo kiri va, natampi, mukimorele ikharari”? Nyuwo mootoko okupali Mukuttho ole woomalela sothene? Nyuwo mootoko omuleela Owo wira nyuwo munnimpenta? Ennoowereihani murima mwaira yoonanara? Mwahaatonko-ene ophiyerya musuwelelo yoowo vano, mwa ovithiwa nno! Okathi, okathi ahu ommalaaya. Moonelo wooreera paahi! Masi, miyo kinniikoha, vakhala wira khimunatoko omwaakhela Kristu okhala Moopoli anyu, kaatthuna kisuwele

sinto mwaamwiira yeeyo okathi onuuramih'ahu miru sahu okathi vakhani mwa masu a mavekelo.

¹¹³ Murumihe yeeyo, *Eriyari ya Miyala Soophweeya*, xontte, Munna Gertie, mwaarineene. Vaareera, etthu p'itthu enimwiira.

¹¹⁴ Ni miru sanyu sowuurama, kinrowa wookohani yookoha emosa y'exariya saana. Muupuwele apathani, natampi wala ooreera murima, nyuwo khamuhiyo oohikhala okathi onoovithaahuni. Munep'anyu ori nipuro nlo. Vano, Yesu aahithotola mapuro oomanli, voolikana ni Soolempwa. Owo aarowa woophwanyani vayi nyuwo mwaaronwe-ru ohiy'ula? Mwaamukhalana mukhora wo omoreliwa ikharari owaliwa ohoolo wanyu, mwaha wo wira murookhootta? Muupuwele, kahi wira Owo Moopoli paahi, Owo Mphuki. Nyuwo mwa mphuki vano, munimphuka sayi Yoowo? Mmuhiye Owo akhale Moopoli anyu vano.

¹¹⁵ Ehantisi yaamukhaani enoorwa mmuruni mwaka. Okathi vakhani ovinre mwammiravo mmosa aakilanthe n—nvakawuni. Kapwitthi khuruma mphironi, vano ikhavalu khutthyawa, owo aarowa vanxephani. Mwammirvo mmosa makhampusi khutthimaka khweemexa ikhavalu okathi vakhani evakawu ehinatthi orowa vanxephani, okhala wira aahikhala-mo mwaana mwemmo. Owo khoopola ekumi ya mwaamukhaani uwo.

¹¹⁶ Iyaakha sinci-ene ohoolo waya, eemenle-ene opwaro wa milattu. Mmiravo yoola aaroopaka ekhirime, aroothara ephiro yoovonyeya, khuttheke. Owo aanwurya, omweetta cuuku, khumoopela mulopwana mmosa; nto aahittheke, aaphwanyaneya oottheke. Vano mphuki khuyenya khwira, "Miyo kinoophukelani oheiwu muxikoni mpakha ekumi anyu enikhwa orowa."

¹¹⁷ Mmirav'ole khwira, "Mphuki!" Vano owo khuhonona mweettelo wa mpwaro, vaatumphe-awe ekorimaawu khumorela vanawoni va mphuki, wira omoreliwe ikharari. Owo khwira, "Mphuki, nkawehani wiitho waka! Khamunkisuwela?"

Owo khwira, "Nnari, mwan'aka, nkinoosuwelani."

¹¹⁸ Owo khwira, "Munnuupuwela ekumi ya mwammiravo mmosa mwaamukhaani nyuwo moopony'anyu, iyaakha sinci-ene khalayi, vakhavaloni yaatthyawa?"

Owo khwira, "Ayo, kinnuupuwela."

¹¹⁹ Owo khwira, "Miyo ka mmiravo yoole." Owo khwira, "Mphuki, nyuwo mwaahikoopola okathi ule. Mukoopole vano!"

¹²⁰ Mphuki khunweha, khwira, "Mwan'aka, nihiku nle miyo kaari moopoli anyu. Olelo miyo ka mphuki anyu."

¹²¹ Olelo Owo ti Moopoli anyu, natampi, meelo Owo pooti okhala Mphuki anyu. Nrowe nuupuwele yeeyo vano, okathi nsipo ninrumaaya. Ni atthu othene avekelaka, ale ari mapuro oovekela ni Muluku.

122 Kaatthuna kisuwele ohiy'ula, naakuvaka, ale yaatthuna omukupali Kristu okhala Moopoli aya, mwiire, "Muluku, mukimorele ikharari miyo, natampi. Kintthuna kirwe mwa Ephome emwaraxiwe. Kihooceya wiitakanxa mukereja ni otthimaka nipuro nnipuro. Kintthuna kiyariwe vasya. Kintthuna musuwelelo mmurimani mwaka kinsuwel'aka wira Kristu ohiisuupulula Mmansawe wa miyo, ni muupululo wa muroohoni mmalyaanyu ohimya, Munna Branham. Kintthuna muupululo wa muroohoni, Erooho Yoowaarya mmurimani mwaka, ekikhalihaka mukumi, emuruuhaka Kristu okhala eekeekhaixa ovikana siryaaka wa yoomi. Miyo kintthuna musuwelelo yoowo, Munna Branham. Munookivekelela kivenxaka ntata naka?" Munnitthuna ovenxa ntata vano, nyuwo muntthuna wuupuweliwa. Muluku ooreeriheni, muhano. Muluku ooreeriheni ottuli iwo, muhano. Ti yooreera. Muluku ooreeriheni, mulopwana. Ti yooreera. Nvenxe matata anyu, vano mutthikele nvexaka ntata.

123 Mwaarowa wuuliwa sayi muru? Mwaanwerya okhootta etthu ntoko Yeeyo, mpatthani? Muupuwele.

124 "Oh," nyuwo muniira, "Munna Branham, alaleyi annilaleya mwa miyaakha sinci-ene." Koosuwela, masi nimosa wa mahiku ala awo anoorowa ohiya olaleya. Nto enamuna ntoko itthu sinooneyaaya, pooti okhala naanaanoru. Munoorowa wiiwa mutthak'anyu wookiserya. Voothepya, ola pooti okhala wookiserya anyu.

125 "Oh," nyuwo muniira, "Miyo ka mmiravo." Eyo khencala. Okhwa khonimuttittimiha mutthu, wala munnuwelo wala eweryelo.

126 Nyuwo vano munoomukupali Owo okhala Moopoli anyu, nvenxaka ntata nanyu, mwiiraka, "Muluku, mukimorele ikharari"? Nvenxe matata anyu n'ala akina, mwiire, "Vano kintthuna kimukupali Kristu." Munnitthuna ovenxa ntata?

127 Mutthu otthikenle ottuli, oniira, "Muluku, mukimorele ikharari. Kintthuna kitthikele wa Kristu ohiyu yoola, wira meelo pooti okhala ohihimuwa, musya, wa miyo." Munnitthuna ovenxa matat'anyu? Nvenxe ntata, mwiire, "Mukimorele ikharari. Kintthuna kirwe naanaano va." Munimwiira? Nvenxe ntata nanyu, mwiire, "Miyo kinnikhalaka ootthikela ottuli, masi ohiy'ula . . ." Muluku ooreeriheni, muhano. Muluku ooreeriheni. Eyo ti yooreera. "Miyo kinoomukupali Kristu okhala Moopoli aka. Miyo kinoomukupali Owo ohiy'ula. Miyo kinneetasaka, miyaakha sinci-ene ottaiwene wa Muluku, masi vano miyo kinimoorwa owaani." Munoomukupali Owo ohiy'ula, wira ola okhale ohihimuwa musya wa nyuwo, makhalelo anyu a khalayi emalihewe?

128 Muhan'ola onoorwa waltaari, wira ahimye, wira akhale. Mutthu mukina onthuna okuxa opuro aya va, orwa osulu nno ni

yoowo, mwa olapa waya? Munnitthuna ovenya, murwe waltaari, nave? Altaari tootthukuwa. Vekeekhai. Rwaani nno, naanaano va. Mwatthuna vale weemela va ni ovekela, sothene sinookhala saana. Rwaani. Munnitthuna orwa? Ni ohimya wo waamini wanyu, wa omwaamini wanyu Mwaana a Muluku, munimoorwa naanaano? Vaarera.

¹²⁹ Eyo ti yawinyu, muupuwele. Ti nyuwo. Nyuwo mwa natampi? Nyuwo mwa namatthikela ottuli? Mwa ooriirya ni ottaiwene wa Kristu? Nto nyuwo muntthuna muhihimuxiwe vasya ni Yoowo vano, opacerya makhalelo vasya? Ankhi nyuwo, iya ni mwaara munkhalaka—munkhalaka ota okathi munciene, munnyakulihanaka owannyinyu? Khamuntthuna orwa olokiherya etthu iyo ni Muluku ni mmosa ni mukhwaawe naanaano? Omukhaliha Paasikha Paasikha eekeekhai wa nyuwo, opacerya etthoko esya.

¹³⁰ Ankhi nyuwo muhinatoko okhala, muhinatoko okhalana mavekelo owannyu, munoorowa owaani paahi okhuma okereja ni ophavela okhala vooreera sinweryaanyu, muhinatoko waaruuha amusi vamosa ni ovekela? Mwaha wa yeeyo nrinaahu opahuwa w'amwaavano ni itthu sirinaahu. Mwaha wa yeeyo itthoko sa wAmerika sinhononeyaaya. Khamuntthuna orwa, opacerya vasya ohiy'ula? Munimwiira? Munnilattuliwa. Muupuwele, miyo ka murumeyi anyu vano; kinookhala namoona nihiku nenlo.

Nirineene miru sahu soowuurama, nto, vano wira nivekele.

¹³¹ Tith'ihu Oottottopeliwa a Wirimu, ohiy'ula hiyo ninruuha wa Nyuwo muthukuman'ola, mwa nttittimiho wooreerihwaxa wa ettittimiheryo hiyo ninsuwelaahu. Hiyo voowiyeviha ninnaattamela Ehice Anyu. Nto vamanlyaaya Mutthaka ohiy'ula, wira, ovithiwa iwe wuulupale, Owo khonakhaleke omaala, munepa Awe waahirowa mapuro khumaliha muteko wa Muluku, Owo aarummwe-awe ovara. Nto meelo voosiisu, ninoophwanya vatthu Owo aaronwaawe ovira mikhalelo osulu, oxinttaka itthu sothene, woohihimuwani Wawe. Masi Owo aahikhuma voosiisu wa Paasikha wira nikhalihiwe anaxariya. Ni ninniphwanya wira Owo ooveleeliha Erooho Yoowaarya, wira yaakupalihe atthu mwaha w'etampi.

¹³² Nto hiyo ninvekela ohiy'ula, Pwiya, wira ale avenxale matat'aya yuupuweliwe ohoolo Wanyu. Wira othanla waya okhale okhuma mmurimani mwaya ohiy'ula, wira awo aawaakhelani Nyuwo, ni owaaminini Nyuwo, ni wira etthittiwe ni Ekanyeryo ya natiri ohiy'ula, Erooho Yoowaarya. Munivahe, Tithi. Maana, hiyo ninnaavahererya wa Nyuwo, ni Mutthak'ola ohiy'ula. Wira waareerihe ale yiiwale Yoowo, ale, Pwiya, anrowa okuxa Owo ni yaawo eroihaka owannyaya, n'ukeliha Yoowo muhina mmurimani mwaya. Wira awo ekhaleke mwa Masu a Muluku. Munivahe, Tithi, maana hiyo ninvekela mwa Nsina na Kristu. Amen.



OVITHIWA EMK57-0420

(The Entombment)

ETTHARANELO MIHAKALALIHO SA PAASIKHA

Mutthak'ola wa Munna William Marrion Branham, opaceryawene olaleeriwe ni Enkelesi Esaapatu ohiyu, mahiku yeettaka 20 mweeri wa Abril, 1957, oBranham Tabernacle oJeffersonville, Indiana, wAmerika, okuxiwe wo okaravariwa mufitani ya makineti khulempwa wothene ni ntaava n'Enkelesi. Otaphuleliwa nno mw'Emakhuwani okhumiheriwe ni okaiwe ni Voice Of God Recordings.

EMAKHUWA

©2023 VGR, ALL RIGHTS RESERVED

VOICE OF GOD RECORDINGS

P.O. Box 950, JEFFERSONVILLE, INDIANA 47131 U.S.A.

www.branham.org

Olopolo mwaha wa ihaakhi sa mwaneene

Ihaakhi sothene sinnaakiheriwa. Eliivuru ila pooti otthittiwa owaani wira mutthu arumeele wala okaiwa, voohilinwa etthu, ntoko ekaruma y'olaleerya Ehapari yooreera ya Yesu Kristu. Eliivuru ila ehitemihiweke, otthittiwa eyaattelo yuulupale, oheliwa muwepisaiti, oheliwa moothukumanyiwa wira ekuxiwe-tho, otaphuleliwa ni mattaava makina, wala orumeeliwa wira ophwanyiwe musurukhu vahikhanle n'utthuniheriwa woolempwa ni Voice Of God Recordings®.

Mwaaphavelaka wiiwa-tho wala ikaruma sikina sikhanelle, xontte mulavule ni:

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org